

Dasar-dasar
Adat Perpatih

OLEH . ABDUL RAHMAN BIN HJ. MOHAMMAD

dasar-dasar adat perpatih

untuk anak2-ku :

- *zarina*
- *zarida*
- *zariati*
- *zaziani*

DASAR-DASAR ADAT PERPATEH

oleh

Abdul Rahman bin Hj. Mohammad



1964

PENERBITAN PUSTAKA ANTARA
KUALA LUMPUR.

BAB VI

LUAK DAN IKATAN SUKU2

Saperti juga keadaan-nya dengan negeri2 lain, maka negeri2 para penganut Adat Perpatih itu pun di-bahagi2kan ka-dalam daerah2 yang tertentu.

Tiap2 daerah itu di-kenali sa-bagai Luak atau Luhak.

Naning dalam Negeri Melaka, Rembau, Johol, Jelevu dan Sungai Ujong dalam Negeri Sembilan ada-lah di-panggil Luak.

Sa-tiap Luak mempunyai Dato' Penghulu-nya sendiri, saperti di-katakan oleh Adat bahawa "Luak ber-Penghulu", dengan Dato' Penghulu itu biasa-nya menyandang atau memakai gelaran **Undang**.

Undang atau Dato' Penghulu itu-lah orang besar yang memerintah saluroh Luak. Kedudokon sa-saorang Undang dalam Luak-nya itu tiada-lah ubah saperti "Raja" dalam negeri2 lain.

Sa-benar-nya Luak itu merupakan tiada lain daripada satu ikatan atau persekutuan, dengan para anggota atau ahli2-nya terdiri daripada Suku2 yang tinggal dalam Luak tersebut.

Kalau satu2 Suku itu merupakan satu ikatan besar Keluarga dengan Anak2-buah-nya kesemua-nya sa-darah

sa-daging, maka Luak itu pula merupakan satu ikatan atau satu persekutuan antara Suku2 atau Keluarga2 yang sa-hangsa dan sa-tanah ayer.

Dato' Penghulu Luak atau Undang itu ada-lah di-pilih dan di-angkat daripada anggota Suku yang khas memerintah dalam Luak.

(Sebab-nya maka hanya satu Suku yang tertentu sahaja di-bolehkan memerintah dalam Luak itu ia-lah oleh kerana nenek moyang Suku itu-lah yang mula2 telah meneroka dan membuka Luak itu. Oleh yang demikian Suku asal dalam sa-tiap Luak itu mendapat kedudukan istimewa, dengan para anggota dari Suku itu berpeluang dan berhak mewarisi pesaka menjadi Dato' Penghulu atau Undang dalam Luak.)

Pemilihan dan pengangkatan sa-saorang Dato' Penghulu atau Undang itu, pada mula2-nya mesti-lah di-jalankan dan di-perkenankan oleh para Buapak dan Lembaga dalam Suku-nya sendiri.

Kemudian perlantekan dan pengangkatan itu hendak-lah di-perkenankan sa-terus-nya oleh para Lembaga dari Suku2 yang bersekutu dalam Luak.

Kapada Lembaga2 atau Wakil2 dari Suku2 itu-lah terletak kekuasaan mu'tamad sama ada sa-saorang chalon yang di-kemukakan itu harus di-terima atau di-tolak menjadi Dato' Penghulu atau Undang.

Dan oleh sebab Lempaga2 itu kesemua-nya di-lantek ka-jawatan mereka oleh Anak2-buah menerusi Buapak2 mereka, maka perlantekan Dato' Penghulu atau pun Undang itu juga dengan sendiri-nya di-jalankan sa-chara adil dan saksama, menurut kehendak ramai belaka, ya'ani menurut kehendak anak2-buah menerusi wakil2 mereka.

Saperti Lembaga2 dan Buapak2, maka Dato' Penghulu atau Undang itu juga boleh di-pechat dengan kebulatan Lembaga2, saperti di-adatkan: "Yang di-lantek boleh di-pechat".

Menurut adat yang di-adatkan, sa-saorang Dato' Penghulu atau Undang itu mesti-lah memerintah dengan "Bersabda di-Balai".

Balai itu ia-lah tempat berunding. Tegas-nya Dato' Penghulu atau Undang itu mesti-lah menjalankan pertadbiran dan pemerantahan Luak-nya sa-chara berunding dengan Lembaga2 di-dalam Luak.

Beberapa Soalan:

- (1) Luak itu apa erti-nya? Terangkan nama Luak2 yang ada di-dapati dalam Negeri Sembilan.
 - (2) Kenapa sa-saorang Undang itu hanya di-pilih dari satu Suku yang khas sahaja?
 - (3) Bagaimana sa-orang Undang itu di-lantek? Kapada siapa ter-serah kuasa menerima atau menolak sa-saorang chalon yang di-kemukakan untok menjadi Undang.
 - (4) Apa-kah yang di-maksudkan dengan "Bersabda di-Balai"?
 - (5) Bagaimana pula boleh di-katakan bahawa sa-saorang Undang itu sa-betul-nya di-lantek oleh Anak-buah2 dalam Luak?
-

PENUTUP

Penyusun ingin mengingatkan bahawa buku ini hanya mencheritakan "Adat Perpateh" itu pada dasar-nya sahaja, kerana perbedzaan2 kechil-kechilan di-sana sini tetap di-dapati dari "Adat Perpateh" yang di-pakai di-Naning dengan yang di-pakai dalam Luak2 Negeri Sembilan dan juga di-Minangkabau; seperti di-katakan oleh pepatah: "Lain padang lain belalang, lain lubok lain ikan". Akan tetapi pada dasar-nya belalang itu belalang juga dan ikan itu ikan juga; dan demikian juga pada dasar-nya "Adat Perpateh" itu ada-lah sama belaka keadaan-nya di-tiap-tiap Luak dan Negeri tersebut.

Berhubung dengan Bab Kesabelas, penyusun meminta ma'af kerana tiada dapat menghurai, membinchang dan mencheritakan kesah "Raja Tiada Bernegeri" itu dengan sa-penoh-nya, kerana ia-nya sa-benar-nya merupakar sejarah Negeri Sembilan, yang sudah tentu akan lebeh sesuai di-binchang dan di-huraikan dalam sa-buah buku sejarah pula.

Di-sini juga penyusun ingin menyatakan bahawa susunan dan kekuasaan pemerintahan seperti telah di-cheritakan itu ada-lah yang telah betul2 di-jalankan di-waktu para penganut "Adat Perpateh" itu telah memerintah negeri2 mereka sendiri.

Kita semua tentu ma'alum bahawa sejak orang2 Minangkabau, Naning dan Negeri Sembilan di-perintah oleh Kuasa2 Penjajah (Belanda dan Inggeris), kuasa2 "Undang", "Lembaga" dan "Buapak" itu sudah banyak di-rampas dan di-perkechilkan.

Hari ini mereka itu hanya mempunyai kuasa menguruskan perkara2 kecil sahaja.

Kita juga terlebih ma'alum bahawa "Adat Perpateh" itu merupakan Falsafah Hidup satu bangsa "Petani".

Maka sama ada Falsafah Hidup itu sesuai atau tidak untuk satu masyarakat yang hidup "Dalam zaman Perindustrian"—seperti zaman yang kita tempoh sekarang—tiadalah penyusun bermaksud membinchangkan-nya pula.